

## DOMINGU I ADVENTU – TINAN A

### Tema

Liturjia domingu ne'e nian apresenta apelu ba vijilánsia. Sarani ida labele tuur metin iha komodizmu, iha pasividade, iha baruk nian, iha rotina; maibé tenke la'ó, nafatin matan moris no vijilante, preparadu atu simu Na'i no hatán ba ninia dezafiu sira.

Leitura dahuluk konvida ema sira – ema hotu, husi rasa no nasaun hotu – atu hakat ba foho Na'i nia horik-fatin... Husi enkontru ho Na'i no ninia Liafuan mak sei fó fuan konkórdia nian, armonia nian, dame ne'ebé la nahas.

Leitura daruak rekomenda fiar-na'in sira atu hadeer husi dukur todan ne'ebé kesi sira ba mundu nia nakukun (mundu egoizmu nian, injustisa, bosok, salan), atu hatais an ho roman (katak Maromak nia moris ne'ebé Kristu oferese ba hotu) no atu la'ó ho ksolok no esperansa, bá hasoru Jezús, bá hasoru salvasaun.

Evanjellu apela ba vijilánsia. Fiar-na'in ideál la moris iha prazér sira ne'ebé halo ita sai rahun, la husik serbsiu esesivu sofoka nia, la dukur iha pasividade ne'ebé na'ok oportunidade; fiar-na'in ideál nafatin matan moris no vijilante iha minutu hotu ne'ebé liu, hodi simu Na'i ne'ebé mai, hodi hatán ba ninia dezafiu sira, hodi kumpre ninia papél, hodi haka'as an iha konstrusaun “Reinu” nian.

### LEITURA I – Is 2,1-5

Testu Is 2,2-4 nian hetan– ho variante ruma no mós adisaun ida – iha Mi 4,1-3, no ida-ne'e favorese ipóteze fonte komún ida, anteriór ba Isaías no Miqueias, ne'ebé redatór rua foti inspirasaun (maski iha ema ne'ebé defende katak testu orijinál mak Isaías nian no Miqueias reproduz de'it ho variante ruma).

Husi konteúdu, provavelmente, ita iha orákulu ida nia oin ne'ebé hetan inspirasaun husi peregrinu sira nia movimentasaun ne'ebé durante festa sira, sa'e ba Jerusalém. Ita imajina, nu'udar ipóteze katak, hakerek-na'in kontempla husi foho Siaun oinsá karavana israelita sira nian bá to'ó foho ne'e atu selebra festa populár ida – porezemplu, festa Tenda/Taka-balluk sira-nian. Nia nota katak karavana sira mai husi parte hotu territóriu nian ne'ebé Maromak nia Povu horik bá; bainhira sira hakbesik daudaun autór poeta rona “knananuk axensaun nian” ne'ebé peregrinu sira uza atu kumprimenta Na'i no husu dame ba Jerusalém no ba nasaun tomak... Iha autór poeta nia fantazia, situasaun nakfilak; nia haree, iha futuro, la iha data definida, povu lubun-boot husi rasa no nasaun hotu, ne'ebé, tanba hetan atrasaun ba Jahwéh, hakat ba hasoru Maromak nia salvasaun. “Mehi” ne'e mak karik sai orijen ba orákulu eskatolójiku ida-ne'e. Iha ita nia oin iha orákulu ida ho inspirasaun boot, kle'an liu no furak tebes husi Testamentu Tuan.

### MENSAJEN

Ita-nia orákulu mak poema pás universál nian no konverjénsia povu hotu nian hale'u Maromak.

Iha profeta nia vizaun, “Na'i nia foho” (foho Templu nian) nakfilak ba sentru mundu nian, la'ós tanba nia aas liu, maibé tanba nia mak Maromak nia horik-fatin (vers. 2a.b). Husi parte

hotu mundu nian konverje karavana sira povu hotu nian ne'ebé avansa, bá hasoru malu no sa'e ba foho tutun, hasoru Na'i (vers. 2c-3a)... Sé mak konvoka sira, kbiit ida ne'ebé mak dada sira?

Resposta hetan iha knananuk ne'ebé akompaña ema sira-ne'e hotu nia dalan; sira sente atrasaun ba Maromak nia Liafuan nia kbiit; hakarak koñese ensinamentu (Torah) no simu hanorin kona-ba Jahwéh nia dalan sira (vers. 3b.c.d.e). Liafuan salvadora no libertadora Jahwéh nian atrai no dada povu hotu ne'ebé la'o iha dalan sira mundu nian, lansa sira iha movimentu úniku no universál, halibur sira hale'u Maromak.

Hodi besik no hale'u Maromak, sira rona Liafuan no aprende ninia dalan sira, halo atu divizaun sira, ostilidade sira, konfliktu sira umanidade nian lakon. Uluknanai, sira aseita Maromak nia arbitrajen loos no pasífika (vers. 4a); hafoin, sira komprende katak la presiza kilat sira; mákina sira funu nian nakfilak iha instrumentu di'ak serbisu no moris nian (vers. 4b.c.d). Husi enkontru ho Maromak no Ninia Liafuan, rezulta armonia, progresu, entendimentu entre povu sira, moris naresin, pás universál.

Kuadru ne'e mak kontráriu Babel nian... Iha istória torre Babel nian (kf. Gn 11,1-9), ema sira hili konfrontu ho Maromak, orgullu no autosufisiénsia; no ida-ne'e lori ba divizaun, ba konfliktu, ba konfuzsaun, ba falta iha entendimentu, ba dispersaun... Oras-ne'e, ema sira hili rona Maromak no tuir dalan sira ne'ebé Nia hatudu; rezultadu mak reuniaun povu hotu nian; entendimentu, armonia, progresu, pás universál. Bainhira mak profesia ne'e sai realidade?

## **LEITURA II – Rom 13,11-14**

Bainhira Paulo hakerek Surat ba Roma, nia iha hela Corinto, durante tempu viajen misionária datoluk... Nia prepara an atu bá Jerusalém ho produstu kolekta nian ne'ebé nia organiza iha Macedónia no iha Acaia nu'udar benefísiu ba “santu sira Jerusalém nian ne'ebé moris iha pobreza” (1 Cor 16,1; kf. Rom 15,25-26). Paulo hanoin katak nia remata ona nia misaun iha lorosae/oriente (kf. Rom 15,19-20) no oras-ne'e hakarak lori Evanjellu ba osidente. Ita iha tinan 57 eh 58.

Pretestu surat nian mak prepara Paulo nia viajen ba España (kf. Rom 15,24)... Iha realidade, Paulo aproveita au kontakta komunidadade Roma nian no apresenta ba ema Roma nian (fiar-na'in sira) problema prinsipál ne'ebé preokupa nia... Ita iha altura iha ne'ebé perigu divizaun nian ameasa Kreda: husi sorin ida komunidadade sira orijen judeu-kristán no husi sorin seluk komunidadade pagaun-kristán; sira la komprende malu no iha perigu divizaun nian. Nune'e Paulo hakerek, hodi subliña unidade fiar nian no bolu atensaun ba igualdade fundamentál hotu-hotu nian – judeu-kristaun no pagaun-kristaun – iha prosesu salvasaun nian.

Parte dahuluk Surat ba Roma (kf. Rom 1,18-11,36) iha karákte dogmátiku no buka hatudu katak Evanjellu mak kbiit ne'ebé halibur no so'i fiar-na'in hotu; parte daruak (kf. Rom 12,1-15,13) iha karákte práttiku no ezorta judeu-kristaun no pagaun-kristaun sira atu moris iha domin.

Testu ne'ebé ohin propoin mai ita pertense ba parte daruak surat nian. Depoizde ezorta sarani sira ne'ebé pertense ba komunidadade Roma nian ba domin ba malu (kf. Rom 13,8-10), Paulo husu sira sai vijilante no preparadu, atu sumu Na'i ne'ebé mai.

### *MENSAJEN*

Hodi refere ba “tempu” ne'ebé sarani sira moris daudaun, Paulo husu sira atu hadeer husi “matan-dukur, tanba salvasaun besik daudaun”. Hodi dehan katak salvasaun besik dadaun, Paulo hakarak hato'o buat sá loos?

Paulo konserteza hanoin kona-ba Jezús nia hiit-An besik duni oan, atu remata istória salvasaun nian; Paulo nia interese la'ós iha "bainhira" no "oinsá", maibé iha signifikadu no konsekuénsia sira fila-hikas nian. Sarani sira moris "tempu ikus" (hahú bainhira Jezús husik mundu no enkarega eskolante sira atu sai sasin salvasaun nian iha ema sira nia oin) molok Jezús mai... Sá de'it konsekuénsia sira?

Molok sira simu batizmu, sarani sira moris iha nakukun no marka ho egoíзму (esesu iha han no hemu, hahalok sabraut, libertinajen, diskórsia no laran-moras); maibé, ho batizmu, sira moris ba realidade foun ida... Ba realidade vida foun nian, livre husi egoíзму no salan, mak sira tenke moris tuir ho modu definitivu, bainhira hein hela Na'i: bainhira Na'i to'o mai, tenke hetan sira kolu husi hatais nakukun nian; no tenke hetan sira matan moris no preparadu, hatais vida foun ne'ebé Kristu oferese ba sira, hodi moris iha fiar, iha domin, iha servisu.

Fundamentalmente, iha ne'e iha konvite atu fiar-na'in sira moris "tempu" ne'e nu'udar tempu ikus no definitivu, ne'ebé tenke sai tempu la'o hasoru Jezús Kristu no salvasaun.

## **EVANJELLU – Mt 24,37-44**

Kapítulu 24 no 25 Evanjellu Mateus nian apresenta diskursu boot ikus Jezús nian molok nia paixaan no mate. Atu hakerek diskursu ne'e, Mateus elabora fali "diskursu eskatolójiku" Marcos nian (kf. Mc 13), hodi haluan tema sentrá: se iha diskursu Marcos hato'o katak kestaun prinsipál mak sinál sira molok Destruisaun Jerusalém no Templu nian, iha diskursu Mateus elabora kestaun sentrá mak Mane Makso'ik nia fila hikis no atitude sira ne'ebé eskolante sira tenke prepara molok Na'i mai.

Mudansa perspetiva nian ida-ne'e bele komprende hodi haree ba situasaun komunidadade Mateus nian no nesesidade ne'ebé nia iha. Ita iha dékada 80. Tinan sanulu liu tiha ona husi destruisaun Jerusalém nian no Jezús nia hiit-An mai ladauk akontese. Fiar-na'in sira dezanimadu no deziludidu... Evanjelista kontempla ho preokupasaun sinál sira abandonu nian, baruk nian, rotina nian, laran-malirin nian ne'ebé hahú mosu iha komunidadade no sente katak presiza hafoun esperansa no lori sarani sira atu kompromete an iha istória, hodi harii "Reinu". Iha situasaun ne'e, Mateus deskobre katak Jezús nia liafuan sira soi hanorin kle'an no ho liafuan sira nia halo ezortasaun ida ba sarani sira. Ezortasaun ida-ne'e iha fundamentu iha konviksaun kle'an: "Mane Makso'ik nia fila-hikas mak faktu ida ne'ebé loos, maski sei la akontese iha tempu badak; enkuantu momentu seidauk to'o, presiza prepara akontesimentu boot ne'e hodi moris tuir Jezús nia hanorin sira.

Linguajen kapítulu sira-ne'e la'ós baibain no nakonu ho enigma... Ne'e mak linguajen apokalíptika tanba ninia objetivu mak revela buat ruma ne'ebé haksumi an hela ("apocaliptô). Iha okaziaun barak, revelasaun ne'e diri je ba komunidadade sira ne'ebé moris iha situasaun terus nian, dezesperu nian; objetivu mak anima sira, fó esperansa ba sira, hatudu ba sira katak vitória finál Maromak nian no sira ne'ebé fiél ba Nia.

### *MENSAJEN*

Ba Mateus Na'i nia fila-hikas ne'e buat loos ida, maski ema ida la hatene loron no oras (kf. Mt 24,36); ba fiar-na'in sira presiza sai vijilante, preparadu no ativu... Atu tranzmite mensajen ne'e, Mateus uza kuadru tolu...

Primeiru (vers. 37-39) mak kuadru umanidade époka Noé nian: ema sira moris, iha inkonxiénsia ksolok nian, preokupa an de'it atu goza moris ida ne'ebé la iha kompromisu; bainhira dilúviu/rai-nabeen to'o, toman sira iha surpresa la preparadu... Se "goza" moris to'o máksimu mak sai prioridade fundamentál ba ema, nia iha risku atu tau iha ninin buat ne'ebé importante no la kumpre ninia papél iha mundu.

Segundu (vers. 40-41) tau ita iha situasaun rua moris loroloron nia oin: serbisu iha to'os no dulas trigu... Kompromisu no serbisu sira ba ema nia subsisténsia bele okupa ema demais to'o nia haluha buat ne'ebé esensiál: preparasaun ba Na'i nia fila hikas.

Terseiru (vers. 43-44) koloka ita iha ezemplu uma-na'in ne'ebé toba dukur no husik na'ok-teen tama no na'ok nia soin hotu... Fiar-na'in sira labele, nunka, dukur, basá dukur todan halo sira lakon oportunidade atu hasoru Na'i ne'ebé mai.

Kestaun fundamentál mak ne'e: fiar-na'in tenke nafatin vijilante, matan moris, preparadu, atu simu Na'i ne'ebé mai. La lakon oportunidade sira, tanba nia la husik soin sira mundu nian halakon nia atensaun, la moris ba sira no la halo sira sai ninia prioridade fundamentál... Maibé, loraun ba loraun, kumpre papél ne'ebé Maromak fô ba nia, ho empenhu no sentidu responsabilidade nian.